

四庫全書

史部

欽定四庫全書

史部

江西通志卷八十七

詳校官監察御史<sub>臣</sub>左周

檢討<sub>臣</sub>德生覆勘

總校官知縣<sub>臣</sub>楊懋珩

校對官助教<sub>臣</sub>胡予震

謄錄監生<sub>臣</sub>劉天綸

欽定四庫全書

江西通志卷七

山川

畫區分紀維山與川或流或峙融結天然禹貢揚州  
江介渺緜彭蠡旣豬標域管先敷淺之原地志實詮  
聖朝啟宇作屏南天峰圍波繞氣象萬千山光有耀江  
華澄鮮靈淑攸鍾名勝留傳古今嘉賞惟茲最焉作

山川志

南昌府

西山在府城西距章江三十里水經注作散原山豫章  
記作厭原山道家第十二洞天名曰天寶極元峰曰  
大簫小簫簫史所嘗遊也又有葛仙峰下為葛仙源  
嶺之最高者曰鶴嶺王仙跨鶴所也曰梅嶺梅福學  
仙處也曰鸞岡洪崖先生乘鸞所憩也宋余靖記云  
巖岫四出千峰北來嵐光染空連屬三百里西山之  
勢高與廬阜等而不與之接餘山則枝附矣周必大

遊錄云以小舟絕江為西山遊初至沙口井在章江  
西岸石頭之上陸行二十五里至貞觀院登閣觀禪  
月羅漢摹本又五里入上藍莊又五里至鸞岡三徐  
葬其旁稍前即翠巖也南唐保大間有澄源禪師無  
殷住此山其後死心居此而雲峰悅亦悟道故江西  
號為勝地觀洪崖井深不可測舊有橋跨其上今廢  
寺引崖水以給用又匯其流激大輪為磨院去崖數  
十步有奉聖宮今曰紫清徐鉉為記又云乘小舟循

溪依嶺行一二里望所謂藥臼者在石澗湍流中如石盤然次度牛欄嶺茶園嶺最後度湯家嶺回望生米洲乃至香城寺榜曰咸通香城蘭若東晉隆安中曇顯肇居此山過樞林一枝最大者圍丈五號將軍樹相傳近千年矣次至硯石長一丈四尺闊六七尺次至靈觀尊者坐禪石次至屋壇是為香城絕頂遠眺章江略見府城山後即江東建昌縣界遊洪崖資禪院去翠微十里而近度落馬嶺乃至本白石道者

智新所居寢室窗外對梅嶺如屏障再過洪崖縱觀  
飛瀑而行了賢送別三徐祠下至江頭僅三十里前  
蓋悞而迂也

按樂史太平寰宇記西山本名南昌山自太平興  
國六年析南昌水西十四鄉置新建縣山因改屬  
焉宋贊皇李上交著豫章西山記一卷板本已燬  
新建徐世溥有西山志略及靈跡記

麥山在府城東南三十里一名脈山或作墨遠望山色

如墨然

斜山在府城南三十五里形家有面山不正之言因呼  
霞山相距數里為虎山

莓苔山在府城東南五十里又十八里為漸山竦如卓

筆俗名尖山其陽隸進賢縣

已上諸山  
屬南昌縣

雞籠山在府城西北十里其山枕江登臨最勝

釣磯山在府城西十里山廣百步四周皆水傳是洪崖

先生釣遊處



雲蓋山距府城西五十里下有龍壽禪院又西十里為罕王山上有廟其神乃漢昭烈曾孫劉獲祈夢多應見宋姚勉碑記舊志作晉司馬儀蓋沿譌也

大球山在府城西南七十里山形雄特宛若獅蹲與小球山相連

逍遙山在府城西南八十里道家第四十福地山陽有許旌陽玉隆宮

卓山在府城西北六十里樵舍鎮上其巔有萬竹亭

牛首山在府城西北八十里隸新建儀鳳鄉又北鄉二十  
二都有棠岡山乃西山盡處也舊建棠岡書院今  
廢

李岐山在府城東北一百四十里鄱湖之西春夏水高  
其巔獨露往來舟楫值風濤者皆泊其下山舊有廟  
相傳神姓李因以名山又東北為几山上有石橋釣  
臺仙巖

吳城山在府城東北一百八十里臨大江上有望湖亭

張令公廟順濟龍王廟宋大中祥符六年御製戒蛟  
文刻于石一云許吳二真君斬蛟處宋文信國天祥  
詩龍行人鬼外神在地天間

吉州山在府城西北一百九十里與松門山相對其上  
居民相傳秦時移此

松門山在府城北二百餘里枕鄱湖之東兩崖生松遙  
望如門山上有石鏡光可照人見寰宇記

已上諸山  
屬新建縣

始豐山在豐城縣南七十五里高三百丈道書第三十

七福地有藥臼洗藥池各二石壁上有白玉蟾影及手書江右福地始豐名山八字南唐徐鉉有記

羅山在豐城縣南一百四十里東接堯山晉羅文通學道於此中為歐石巖其巔有池又名池山

澄山在豐城縣南一百四十七里產茶其下有水澄澈土人取水造麴色如丹砂一名孤山

杯山在豐城縣南一百五十里周迴百里形如覆杯豐水所出

白馬山在豐城縣東南三十五里相傳晉世有三神乘  
白馬於此鄉人祀之

龍門山在豐城縣東南一百里西北與道人山接相傳  
馬祖道一駐錫於此前有七寶峰傍有龍湫

堯山在豐城縣東南一百四十里上有堯壇因名

鍾城山在豐城縣東四十里有景福觀前為城岡山下  
有瀑泉數十泓大旱不竭

櫛山在豐城縣東六十里產櫛木有磐石可坐百人徐

孺子讀書臺在焉旁有三角山

鳳皇山在豐城縣東七十里晉昇平四年鳳皇將九雛  
見於此相近有鵠仙山

梅仙山在豐城縣西十里濱大江相傳梅福隱此

磯頭山在豐城縣北十里下臨曲江宋姚勉詩曲江磯  
頭山翠律此景江南誇第一

壇石山在進賢縣治後相傳闕縣時得斷石有尉遲恭  
監修五字其東為烏石山

三臺山在進賢縣儒學前一曰鳳臺一曰鸞臺一曰鶴臺下矚常河九曲

麻山在進賢縣南二十里上有麻姑壇豫章志云晉王郭二仙憩息之地後包真人於此昇舉有龍井禱雨輒應

鐘山在進賢縣西南五里一名上下破山二山臨水破裂元大德間得銅鐘十二

英山在進賢縣西十五里臨青嵐湖有陽和天井傳與

積烟山通

金山在進賢縣西南三十里其下有淘金井山與臨川  
接界

槲山在進賢縣南四十里一名臧山唐臧嘉猷隱此山  
木冬夏常青

巖前山在進賢縣東南七十里其巖一若獅一若象  
棲賢山在進賢縣東七十里唐撫州刺史戴叔倫寓此  
因名舊稱小天山



北山在進賢縣北一百里地濱彭蠡四面皆水其土平  
利耕作元伯顏子中隱此有啼鳥不知江國變多情  
情到處勸人歸之句

登高山在奉新縣治北一名龍山又名獅山下有泉名  
馮井井上有倉城其頂平敞足以眺遠

陶仙山在奉新縣南十五里世傳陶安公乘龍上昇處  
藥王山在奉新縣西五十里豫章記晉吳猛騎虎入山  
處或云文簫吳綵鸞寄食鄒舉家俄跨虎仙去留藥

一粒與主人且遺以詩一作越王山

華林山在奉新縣西南四十里半屬高安其山三峰秀拔土人常伺雲氣舒卷以驗晴雨南有浮雲宮及仙姑壇故址元至正間李普成王普敬明正德間陳福一羅長一皆據此為寇

九仙山在奉新縣西八十里上有壽堂禪院山北有湯泉一溫一沸上有亭宋潘興嗣作記

晏嶂山在奉新縣西南八十里層巒高聳四面如屏山

南有劉仙巖晉劉道成修煉所山巔有風洞穴闊二丈許風常出焉

百丈山在奉新縣西一百四十里馮水倒出飛下千尺故名以其勢出羣山又名大雄山唐宣宗潛遊至此嘗賦詩山有草花如蓮名山蓮見明陳芹遊記距山西南里許有駐蹕山一名車輪峰宣宗迎回駐蹕於此又縣西南三十里有駕山其南為王見山皆以宣宗訪逸民鄒垣得名

吳憩山在靖安縣北五里世傳吳真君猛嘗憩於此相  
近有繡谷山一名幽谷山山半瀑布如練

金城山在靖安縣西北五里馬湖水遶其麓

葛僊山在靖安縣西北二十餘里按豫章志仙本楚人  
漢末隱此或云即葛洪也有煉丹壇壇之左有葛仙  
菴其巔有金鐘每遇風雨晦冥則有聲明正德間土  
寇胡雪二立寨山上即瑪瑙崖是也

桃源山在靖安縣西北四十里勝槩宛若武陵上有仙

姑壇及龍鬚藥臼車箱等九洞其水注下南與毛竹  
礫水合唐校書郎劉翥虛嘗居此號為孝弟鄉一云  
是宋支離翁劉子虛居址相近為石門山山有寶峰  
院唐權德輿有碑記又有名山洪芻祐聖院記云右  
鶴嶺而左名山長溪出焉

洪屏山在靖安縣北七十里其山四圍壁立路止一線  
可通水潺石逼凜然可畏

黃茅山距靖安縣六十里許在礫坑忠夏兩都之間延

袤二十里鳥道羊腸行者苦之

國朝康熙二十六年始建茶亭三十一年知縣高克藩  
復建庵於亭側

玉枕山在武寧縣治北其形如枕西有四望山高下相  
等

七里山在武寧縣西一里其山陡峻逼倚修江宋邑人  
李道宗於山腰鑿路約七里許歲久崩壞明弘治間  
邑人盛如江改鑿於下

武安山在武寧縣東南二十五里元季邑人胡紹遠兄弟聚鄉兵於此立寨

柳山在武寧縣西南四十里孤峰秀拔唐柳渾隱此

嚴陽山在武寧縣南四十里相傳嚴陽尊者結庵於此庵側有泉二泓自石間流出名石鑊泉

伊山在武寧縣北三十里俗傳伊叟拾蛇卵後成龍叟死龍湧沙石瘞之

石鏡山在武寧縣東北四十里其色黑形如鏡

遼山在武寧縣西七十里雄據上游為邑巨鎮

太平山在武寧縣西九十里與湖廣興國州相連鶴皋  
龍井勝跡頗多元揭溪斯有太平山雜咏二十二首  
魯溪山在武寧縣北七十里山枕魯溪之上石屋石田  
形狀不一世傳劉真人修煉處

朱家山在武寧縣南一百二十里接靖安界

楊新山在武寧縣東北一百四十里與興國州分水界  
九宮山在武寧縣西北一百八十里其陰隸湖廣通山



縣上有瀑布下有溫泉為西境之勝世傳有九龍降  
於池故名一云昔晉安王氏兄弟九人造九宮於此  
宋時方士張道清曾建欽天瑞慶宮於上謝文節枋  
得詩真人何代結幽棲累世奎光煥紫泥蓋紀實也  
鳳凰山在寧州北二百步如鳳展翼乃州之主山也上  
有臺曰鳳凰臺

南山在寧州南二里隔溪跨橋穿石竇而入懸崖峭壁  
下瞰修水有釣磯及玉溜石積雪石俱黃庭堅題字

又南十餘里為壘金山有高岡亭飛龍閣招黃臺深  
澗曲流石門松徑頗擅登臨之勝

旌陽山在寧州東一里層崖壁立截修水口晉許遜逐  
蛟過此因名

雞鳴山在寧州西五里青峰峭絕每夜深風靜聞雞唱  
若天鷗之類山麓有謁仙亭又西為鹿源山上有九  
峰相傳仙人常乘白鹿出入其間

龍峰山在寧州東四十里狀類九峰下有龍峰院

毛竹山在寧州東南一百二十里勢連東津山按圖經  
此山路塞宋治平間余奭開鑿至爛泥坪始通往來  
嶢巖山在寧州西七十里山有四十餘穴每天晴穴內  
風出子午卯酉時尤盛相近有攝仙山狀如獅中有  
二巖巖各有穴其下有龍潭

島石山在寧州西八十里上有李仙姑壇歲旱應禱又  
西十里為桃峰山有雷巖石神像禱雨頗應

大湖山在寧州西一百四十里山巔有池廣六丈泉流

不竭注下為百菖水

大幽山在寧州西南八十里中有金雞橋前後深淵曲澗明萬厯初為盜藪後勦平之

大瀉山在寧州西南一百五十里西通湖廣瀏陽縣東通新昌縣南通湖廣興國州林木鬱塞盜賊淵藪明萬厯五年設銅鼓石營守備於此尋廢

國朝雍正四年復增設駐防兵營詳兵衛志對面為黃壁山

黃龍山在寧州西一百八十里連湖廣通城縣一名輔  
山高千餘仞下有冷暖二泉山頂湫中有黃魚能致  
風雨歲旱禱之輒應吳黃武中黃龍見彼時屬武昌

郡

幕阜山在寧州西一百九十里與湖廣通城縣相連高  
一千丈廣袤一百二十里吳都尉太史慈拒劉磐於  
此置營幕因名山上有石名繫舟峰有列仙壇匯沙  
池芙蓉池海棠洞仙人洞晉葛洪著山記一卷其東

為青龍山相傳有禪師駐錫於此能馴猛虎里人結庵奉之

安峰在西山孤峭入雲宛若削成蓋簫峰之亞也又有鷺峰石塚千層上圓平若鼓狀叩之比湖口石鐘聲尤洪亮

上天峰在府城西北七十里其下有泓巖谷泉石交勝金牛峰在豐城縣東北四十五里相近為龍巖伏巖月巖

香爐峰在進賢縣東南四十里狀如香爐時雨將作烟霧溘然上有許旌陽祠

白狐峰在進賢縣西五十里上有架梁巖摩雲頂諸景仙壇峰在進賢縣東七十里其巔有仙壇歲旱禱之縣北二十里有雙乳峰

迦葉峰在奉新縣大智院東其南為釋迦峰

譙母峰在靖安縣北十里世傳許旌陽會譙母於此其地桃花夾徑上有石壇爐竈相對者為曹仙洞縣北

又有白雲峰二峰狀如丫髻天將雨則其巔出雲

寶蓮峰在靖安縣北四十里唐釋馬道一卓錫之地貞元四年建骨塔宋紹聖初真淨禪師亦葬此

桃花峰在武寧縣東三十里

七臺峰在寧州西八十里臺源之側

江前嶺在府城南七十里亦名躍龍岡

白湖嶺在府城南九十里下有白水湖故名

二嶺屬南昌縣

金嶺一名金邱在西山距府城三十里丁栖霞修煉所



緱嶺在西山距府城五十里隸新建遊仙鄉舊志云與鶴嶺對陳弘緒寒夜錄云宋熙寧中王迪為洪州司理有仙術跨鶴歷諸峰而去姓同子喬而跨鶴又同因以洛中緱山名之又遊仙鄉太平鄉之界有吳仙嶺上有紫雲宮晉吳猛修煉地其下為天師谷唐天師萬振勅葬杖履處

雷王嶺在西山距府城四十里中祀雷神一名靈峰嶺又東吳王嶺廟祀吳王孫策或云吳王濞鑄錢而祠

之非也

桃花嶺在府城西北五十里隸新建桃花鄉明張文端  
位有詩家住杏花村身寄桃花嶺後少宰熊文舉得  
之有記云桃花嶺在西山四面如桃花不與衆山連  
屬最為秀倩今屬新建裴氏種松萬株鬱然增勝

白仙嶺在府城西七十里祀宋真人白玉蟾

蜜嶺在豐城縣西十五里一名仙姑嶺高二百丈邑之  
屏蔽上有招雲石劍脊石下有蜜泉清冽甘美

連珠嶺在豐城縣西九十里高低聯絡如珠

盤賢嶺在進賢縣南三里許昔朱子往泉州與友人呂伯恭盤桓於此故名

霧嶺在進賢縣治南百步環迤如帶元大德中縣尹趙銓鑿為衢縣東五里黃嶺有泉注于大滿龍潭

野塘嶺在進賢縣東南六十里一名野塘峽巨石如盤西五十步有泉利灌溉

虬嶺在奉新縣東南二十里半屬高安上有漢劉繇廟

狐尾嶺在靖安縣南為縣治來脈其上有神壇

碎石嶺在武寧縣東三十里黃土嶺在縣西北一百二十里

上坑嶺有二一在寧州南十里登其巔可瞭一州一在州之高鄉與鼇嶺相接

長定岡在府城南二十五里梧桐岡在府城東南三十里又東南十里為橫岡其勢接旗頭岡橫偃而來當府城之上

象尾岡在府城南四十里形如象尾相近有澹岡及隆岡宋淳熙間進士劉邦本建隆岡書院其裔孫藏有朱子所題四景詩

齊城岡鼻塔岡俱在府城東二十里

以上諸岡屬南昌縣

翻車岡在府城西南四十里上有許仙廟事詳列仙傳綵鸞岡在府城西七十里舊有會仙亭明祭酒胡儼詩相隨一徑入煙蘿隱隱雲中尚踏歌

赤岡在豐城縣西北五十里界接新建瀕江壁立土石

皆赤朱子詩曉起清江弄小舟晚風吹過赤岡頭

拜虎岡在進賢縣北二十里明洪武初孝子包實夫拜  
虎處邑人陳善有記縣東八十里有大小歇岡

鼓樓岡在奉新縣王見山西亦因唐宣宗得名

龍岡在靖安縣西四十里每歲旱禱有應

紫鹿岡在武寧縣東三十里與青牛洞相峙舊志云王  
子喬騎紫鹿訪丁令威者妄也

洪崖在西山距府城四十里一名伏龍山乃洪崖先生

煉藥處有洞居水中宸濠嘗戽水見底有五井各方  
廣四尺許洞側瀑布泉狀如玉簾歐陽修品為第八  
泉徐世溥遊記云由江三十里抵洪崖兩崖石數十  
尋皆釜色時有白繡紛若疊菊直上高五六里西山  
之水飛鳴而下從石壁橫灑若疾風吹雨莫不斜飛  
左右有鐘磬兩石巨若輪橫無所倚水東奔激之翁  
然為鐘聲若倚瀉西擊則鏗然若磬春夏水瀾不復  
見但聞鐘磬聲也

雙泉崖有二一在寧州西一百二十里崖口可容百人  
內有石類獅左右二石形如鐘鼓有池澄澈滂不溢  
旱不乾一在寧州東泰鄉其中幽邃有水通武寧縣  
之康灘二崖禱雨輒應

仙蹟巖在府城西四十里西山凌雲觀側宋楊傑詩出  
塵舉天步踏石上雲梯

野狐巖在奉新縣百丈山後昔懷誨禪師開堂有老人  
聽說法曰墮落此山今有幸矣明日見老狐斃巖下



宴坐巖在靖安縣北四十里寶峯寺側宋袁陟有詩

清水巖在寧州東北二十里南巖有石室北巖多蘭蕙  
黃庭堅云清水巖號為天下勝處

靈石巖在寧州西南一百二十里頂圓中空狀若懸磬  
疊屏巖在州西一百八十里修水之上

秦人洞在西山齊源嶺側徐世溥遊記云洞口容兩人  
稍進可容十餘人沙石明淨水聲在上從洞中聽之  
若笙簧自天來矣前有石門限由限進三十餘步石

門閉不可開窺之綠草萋然多紫蜻蜓飛翔往來境  
幽竊舉火始可得徑昔有入者見石几胡牀之屬父  
老云世治則石門閉亂則自開以待隱者相近為鄢  
家山地僻民淳花香竹翠世溥亦有小記

天寶洞在府城西八十里西山最勝處洞門有石泉狀  
如水簾宋嘗遣使投金龍玉簡於此又有翔鸞洞石  
室敞豁可容數十人

潘仙洞在西山伍諫鄉翊真觀側傳是女真又洪崖鄉

有逍遙洞道士張逍遙脩真處

海棠洞在進賢縣東七十里臧嘉猷讀書處

投龍洞在奉新縣元秀峰南五里舊名浮邱石室乃浮邱公遊息處唐明皇於此投金龍因名昭宗時里人黃琯得金簡玉環簡重四斤十二兩上有鏤文八十字宋大中祥符三年遣使復投金龍於此

李八百洞在奉新縣南三十里浮雲宮西洞口甚隘但可側肩而入行數十步漸高敞其深莫測相傳異人

李真隱此自稱八百歲高安縣亦有李八百洞與此相通唐開元初孫天師智諒於此藏道書又名孫天師石室符載詩太極之年混沌闢此山亦是神仙宅後世何人來飛昇紫陽真人李八百

雷洞在武寧縣南八十里洞中常有雷興人不敢入

鳴水洞在寧州黃龍山西南水行兩石間其高數十丈直下聲如雷流十餘里始達平田宋韓駒有詩

石人洞在寧州西七十五里洞口有石如人歲旱禱雨

以泥塗首輒應又州西南一百二十里有櫻桃洞

佛名石在西山齊源嶺下相傳石能為厲有僧鐫佛號於上故名又西山泉頂壇側有雞冠石

鎮蛟石在奉新縣延真觀內舊傳許吳二真君逐蛟入穴以巨石書符鎮之又旌陽試劍石在三十四都又有渚石臨水高三十丈上有字髣髴似印俗呼印山丫口石在奉新縣西南六十里浮雲山西一石分三尖大義石在奉新縣百丈山大智令衆僧開田為說大義

故名相傳師示寂時有石開一拳吾當再來之記後  
生紅柏一枝石因開焉

石柱在武寧縣西南二百里俗呼南山神石周迴二百  
五十步四面削成如柱

銅鼓石在寧州西南武鄉大瀉山石高數丈形類銅鼓  
抱子石在寧州東十五里修水之濱石狀如人屹立前  
有小石二故名

章江在府城西章江門外一名贛水前漢地理志云豫

章水出贛縣西南北入大江後漢郡國志云贛有豫  
章水酈道元云贛水北逕南昌縣城西又北逕龍沙  
西其水總納十川同湊一瀆俱注於彭蠡也舊志云  
章水發源竄遠控引衆流至此故江獨以章名按洪  
乘編遺云唐代宗諱豫凡豫章上書者去豫止稱章  
則茲水在唐初本名豫章江也餘見南安府山川及  
水利志

劍江源出章貢由清江遶豐城縣折而西北為劍江亦

名劍水又東流入鄱湖

曲江在豐城縣東北十里形如半月分三潭岸傍民居繚繞榆柳成行水波之豔如盪金碧舊傳宋隆祐太后以金花投潭祈風又名金花潭

東湖在府城東隅水清魚美酈道元稱東太湖十里二百二十六步北與城齊南緣迴折至南塘水通大江者是也其後淤塞周廣僅五里歷代濬治詳見水利及藝文



鄱陽湖在府城東北一百五十里即禹貢彭蠡是也隋以鄱陽山所接故名鄱陽湖合受上流諸水周環數百里東至饒州府餘干縣之康郎山西至新建縣荷陂里南至進賢縣北山北至南康府都昌縣南宋王安石詩茫茫彭蠡春無地白浪春風濕天際李綱詩羣川已會江不湍朝宗到海東南安

瑤湖在府城東十五里又東三十五里為南湖源出進賢縣羅溪嶺又府城南二十五里有汝池湖

黃白湖在府城南七十里一名柏湖中有鳳溪山九龍井地讖云兩水夾紅沙狀元出誰家湖田磽瘠明喻均有議復黃白湖田則碑記

金鐘湖在西山天寶洞上周廣三丈唐武后賜天師萬振金鐘玉磬後遺湖中湖有石榻存焉

百斤湖在豐城縣東十里溉田五百餘頃又東為株湖長十餘里溉田千餘頃

銅湖在豐城縣東二十五里上通豐富二水下接撫河

蛟湖在豐城縣西十五里源發劍池東北流五里許匯為湖流入長樂港灌田數百頃

蓮花湖在豐城縣北五里流遶縣治前即腰帶水

藥湖在豐城縣北五十里宣風鄉周廣四十餘里相傳真君許遜經此水蛭黏其馬足投丹湖中水蛭遂絕其北隸新建縣

軍山湖在進賢縣北延袤五十餘里有軍湖書院遺址又有日月湖水涸時分為二漲則合為一湖中有灘

金  
卷七  
曰石人讖云日月湖明良將出石人灘合狀元生明  
正德間舒文節芬應之

馬祖湖在寧州崇鄉相傳馬祖道一往黃龍山經此  
蜀水在府城西南六十里本瑞州高安縣錦江東流入  
南昌境合象牙潭水入章江舊傳晉元帝時大疫人  
詣許遜求療時為蜀旌陽縣令與水一器令投上流  
飲者皆愈故名按班固漢志已云建成蜀水東至南  
昌知傳者之妄也

西洛水在府城東南七十里源出盱汝東北入武陽水  
又東北入宮亭湖

上僚水在府城西北一百二十里源出建昌縣逕奉新  
縣流至此一作上僚江表傳稱海昏上僚津有五六  
千家相結聚作宗伍惟納租布於郡吳志稱孫策勸  
廬江太守劉勲攻取上僚是也上僚有亭亭側有三  
百家見雷次宗記

雩韶水在豐城縣東南一百十三里源出撫州橫汭河

西流入縣界隱溪水東流入之

富水在豐城縣東南一百二十里源出羅山流合豐水  
豐水在豐城縣南一百八十里源出杯山舊由長樂港  
入章江每春漲江水逆入為患明永樂間耆民楊長  
和疏請設堤障之導其流入三溪津達中溪環邑南  
與富水會至小港口入章江

院澤水在進賢縣東南五里源出榑山匯於臧溪蜿蜒  
九曲繞學前合通濟港流入青嵐湖

三陽水在進賢縣北六十里以南陽洞陽武陽三水合流入鄱湖故名

馮水在奉新縣南一百五十步源發百丈山圖經云昔漢徙江東馮氏之族於海昏因名

龍溪水在奉新縣西二十里源出藥王山流經縣界南合馮水梁天監中獲四目龜于此

華林水在奉新縣西南四十里源出華林山縈紆至縣東馮田渡與馮水合

大橫溪水在靖安縣寶峰寺側宋袁陟詩昨日溪橋上  
潺湲已可聽

磧溪水在武寧縣東二百步源出雙嶠山繞城而西又  
南入修水今已失其故道詳見水利志

鳳口水在武寧縣東北七里其水發自三港

修醴水在武寧縣西四十里源出大孤山入修水

修水在寧州西六十里源出黃龍山納衆水東北流六  
百六十里入鄱湖以其修遠故曰修水水經注訛為



循舊傳郭璞識云有水名修有魚名鯪天下大亂此地無憂見宋洪芻職方乘

鹿源水在寧州西八里源出高鄉

鶴源水在寧州東北七十里發源湖廣九宮山南流與修水合嘗有羣鶴飲集于此故名其自境內西流入湖廣平江縣者乃汨水也水經作潁水

杏苑水發源寧州幕阜山流經查田津入修水

映溪在府城東南一名自家溪周四十餘里

曹溪在府城西南八十里其派分自三江流至萬舍合  
西洛水

槎溪在豐城縣南八十里源出猴峰西流經黃金橋入  
文江過黃沙瀝烏石岡隨地築堰三十餘所利灌溉  
晉范太守甯得靈槎于白石墓故以名溪

杭溪在豐城縣西源出介山匯于藥湖又會筠河入劍  
江

羅溪在進賢縣西二十五里羅溪嶺下

藏溪在奉新縣西十里延貞觀側

雙溪自毛竹山發源一歷南源達追里一歷象湖達桐城二水遶靖安縣而流故名雙溪

義溪在武寧縣西一百里源出西港昔有周姓者七世同居故名

紫陽溪在寧州雙井下黃善所居之地

象牙潭在府城西南八十里其洲灣繞狀類象牙明解縉詩西去一山如翠帶舟人說是象牙潭

生米潭在翻車岡之東上有生米市世傳有人投生米于潭中捕魚不覺行入一石門煥然明徹見白顙翁曰此非汝所宜來漁人遽出登岸入水已三日矣或云此即西山天寶洞南門也一說旌陽僕夫許大覆車遺米於地米皆復生故名

化龍潭在豐城縣西南七十里

蘆蒿潭在進賢縣北八十里其水通臨川縣積煙山龍穴宋淳熙間舟人見五龍升降其間翼日乃雨

馬投潭在奉新縣西四十里中會村俗傳司馬頭陀於此潭赴水從頭陀山寺後井中出今呼為司馬井  
泐潭在靖安縣寶峰寺旁潭中有石如木魚擊之有聲  
有石如硯注水一泓四時不竭

龍潭在武寧縣西一里其深數丈宋詔建放生池於其側近岸有磐石名龍潭石臺又縣南一里有節婦潭  
犀津潭在寧州西三里一名西津壁間有白石狀若夜月倒影于水過客疑以為寶盜鑿之其影遂滅

石池潭在寧州西四十五里黃庭堅詩吾家溪潭動百  
尺坐見游魚可倒指

石掌灘在靖安縣西四十里其水出桃源山南流五里  
入雙溪

三洪灘在武寧縣東七十里亂石縱橫其勢竄險又有  
東渡灘鳳口灘鹿角灘徐灘車頭灘涇灘鷺鴛灘俱  
在縣東新縣灘在武寧縣西三十八里唐景雲間新  
遷豫寧縣之側又有張家灘梅瀨灘惡瀨灘抖擻灘

大湖灘牛渡灘蘆陂灘渠良灘醴溪灘桃林灘影灘  
新開灘斜石灘俱在縣西

大小神灘俱在寧州泰鄉高城灘在寧州高鄉故西安  
縣城之側又洪水灘在寧州西九十里

潭源在府城西五十里隸新建忠信鄉自簫峰下流為  
西山七源之一

白石源在府城西三十里源出梅嶺下灌田四百餘頃  
相近有銅源唐光化中銅溢鍾傳採以鑄鐘磬又有

吳源其水自西山風雨池奔注灌田千餘頃

黃源在府城西南五十里簫峰下縈流六十里合蜀水  
入象牙潭宋袁陟詩買田簫峰下結茅蒼松根寄謝  
昇平時歸興在黃源

香城源在府城西八十里發源香城山曲折注于洪崖  
入鸞陂

慨江口在府城北八十里源發寧州逕建昌縣又東流  
至此與章江合漢昌邑王賀徙海昏每乘流東望輒



慨憤而還故名俗譌為漢口

白沙口在府城北樵舍下西北流經昌邑王故城東南至神塘湖轉流入慨江口

龍沙在府城北帶江酈道元云沙甚潔白高峻而陔有龍形連亘五里中舊俗九月九日升高處也唐權德輿詩龍沙重九會千騎駐旌旗宋潘興嗣詩五陵無限人密視龍沙記

南浦在府城廣潤門外置南浦驛濱江有汙龍湫

金匱山房  
卷七  
青雲浦在府城南十五里產異花名七里香有梅仙祠  
龍湫在豐城縣西南三十里衆峰坳處內有蟄龍雖積  
雨久旱水無增減中有石色深黑可琢為硯

百花洲在府城東湖內宋紹興間轉運副使張澄建講  
武亭于洲上遺蹟久廢

國朝康熙戊戌修葺竣工繞湖甃石畫檻紅橋有古講  
武堂滄浪亭諸勝雍正八年巡撫謝旻布政使李蘭  
按察使胡瀛捐貲重修環堤植柳數千株春夏間蔥

鬱尤可愛

蓼洲在府城西一里南塘灣二洲相並水自中流入章江有民居數百家一名谷鹿洲酈道元云贛水又逕谷鹿洲即此北堂書鈔作輶舫洲云是呂蒙作勾鹿大舫處

黃牛洲在府城西南十里相傳許旌陽逐蛟至此化為黃牛又西南十里為吳家洲在沙井上又有滕家郭家二洲

鳳凰洲在章江中自章江門外橫阜經夕佳樓抵石頭  
口如鳳翼然

楊子洲在府城西北隅章江中周廣二十里洲上有唐  
李承勳廟形家言三墩九洲皆順水砂惟此洲為水  
口逆關舊有江天閣龍華塔俱廢

苦竹洲在豐城縣上游十里許其洲多竹昔陳高祖霸  
先遣周文育帥師擒歐陽頠於此

三洲在豐城縣北小港之外上楊林中牛宿下金雞識

云三洲相連必出狀元

龍霧洲在豐城縣北四十里中皆橘林今稱金鐘口相傳宋世有漁者得一金鐘博識者謂為宣和故物洲左有羸螭石

龍馬洲在進賢縣北四十里軍山湖畔又縣東北四十里有迴龍洲宋淳熙中獲白龜於此

漉洲在武寧縣東十里又縣南十二里有費家洲縣東七十里有團洲

馬家洲在寧州南一里舊有黃庭堅祠

洗馬池在府學右職方乘云是漢灌嬰飲馬處明御史  
張謙命工浚鑿改物華樓為書院萬厯間改為巡撫  
劉光濟仁政祠今祠左有小池是其遺蹟

黑池在南昌故縣治東梅福故宅內後入太乙觀

石臼池在樵舍池側有石如臼俗傳許旌陽擣藥處

泣冰池在府城西南松湖鎮孝子陽霖泣冰處事詳元

史虞集亦有記

放生池有二一在東湖之西唐先天二年都督張廷珪  
奏置一在石頭津有宣城守周擇從記

劍池在豐城縣西南三十里晉雷煥掘獄得龍泉太阿  
二劍處梁陰鏗有詩

九子池在豐城縣東南苦竹村相傳鳳皇將九雛飲此  
九龍池在奉新縣浮雲宮前宋胡仲堯創華林書院學  
者嘗洗硯於此亦名墨池

天澤池在靖安縣治後宋邑人舒邦佐所鑿

磨劍池在寧州有二一在州治東隔修水一里一在州西二十里舊傳許旌陽逐蛟于此磨劍宋蔣之奇有詩

青龍沼在武寧縣東三里嘗有青龍出此因名又桃花峰側有丹沼

馬跑泉淺沙泉俱在府城北舊薦福院敷佑廟壇下北曰馬跑水極清冷南曰淺沙深纔二尺冬夏不竭

孝感泉在豐城縣道人山聖乘院內宋紹興元年少卿



曹戩寓此其母喜茗飲初無井戩齋戒虔祝斷地尺餘泉忽湧出人以孝感目之

給事泉在豐城縣智度院宋紹興間給事胡安國與子寅寓此愛其泉美常汲之故名

上泉在武寧縣東北六十里利灌溉

分水泉在武寧縣東北七十里梅崖山西流七十里至湖廣興國州入楊新河

溫泉寧州有三一曰石壁溫泉一曰白沙灣溫泉俱在

武鄉一曰長茅溫泉在安鄉

龍井有二一在南昌鍾陵鄉慈雲院內每風雨井水常鳴一在城東南總持寺春夏不增秋冬不竭

蛟井在府城西故上藍院一名橫泉相傳許旌陽逐蛟蛟奔於井又云梁葛鰓宅東南井中有兩龍鬪半月不解鰓懼捨宅為寺今南昌縣治也

鐵柱觀井在府城廣潤門左舊傳井與江水相消長中有鐵柱許旌陽所鑄以鎮蛟螭考鐵柱有二其一在

西山雙嶺南明宋濂有鎮蛟靈柱頌

魏夫人丹井在建德觀井覆以亭夫人即南嶽紫虛元君晉世修真于此彭真人丹井在宗華觀南宋宣和中浚井得石匣內有小金盒貯二丹

呪劍丹井在府城外蓼洲妙濟觀內

謝公井在府城東山寺相傳靈運于井側注老子等經唐泉井在府城孚應廟有古槐傳是唐崔隱士手植或云廟神即崔子玉以輔佐東嶽而祀之也

沙井在府城章江門外石頭津上許旌陽有江沙掩井  
吾道復興之讖

八角井在小石頭西五里世傳鎮南節度使鍾傳家井  
鹿井在府城西南七十里久駐村井在溪中天旱溪涸  
井乃見紫色迴旋膚色光瑩石罅中清泉湧出以烹  
茗輒成紫色曾有羣鹿飲其中故名

梅仙壇井在豐城縣西北十里相傳梅子真嘗嘗丹砂  
於此井水所漬多化為禹餘糧土人呼為石中黃

聖井在進賢縣舊麻姑觀東乃包真人顯蹟處優游井  
在崇真觀臧嘉猷所鑿張道姑井在明心寺水或五  
七年一湧

劉真君丹井在奉新縣昭德觀晉劉道成煉丹所宋元  
豐七年蘇軾過此題云五月九日寓新吳同縣令李  
志中謁劉真君祠酌丹泉飲之即此井也久堙在月  
臺上明弘治間知府祝瀚掘井數丈得印劍各一劍  
攜去印存本觀

涂七公井在奉新縣東六十步長街之南七公廟前初  
七公卜徙縣治為民鑿井象七星此井水尤甘

法藥井在靖安縣法藥院內相傳馬祖道一鑿池出水  
以飲疫者

泉井在靖安縣石馬都上林其泉望南東流灌田四百  
五十畝

雙井在寧州西三十里黃庭堅所居之南溪心有二井  
土人汲以造茶絕勝他處庭堅有送雙井茶與蘇軾

詩又州南三十步掘二井以制火災亦名雙井

義井在寧州西三百步宋時陳氏八百餘口同爨汲此

江西通志卷七



欽定四庫全書

江西通志卷八

山川二

瑞州府

碧落山亦名鳳皇山在府治後上有碧落堂相傳唐武德時應智顓刺郡鳳皇集於此山故名

小洞山在府城西北府學之右宋蘇轍與知軍毛維瞻探菊有句云菊花金粟未曾吐桂酒鶯兒空自黃明

卷八  
景泰初知府夏泉建清風亭

逍遙山在府城西北唐元和十年徙元陽觀於其上宋改為妙真宮有仙人李八百葫蘆井

大愚山在府城東南朝陽門外山麓有真如寺宋呂祖儉上書忤韓侂胄安置韶州遇赦移高安寓此因號大愚叟

龍化山在府城西南上蔡門外舊傳東晉時有龍乘雲化去故名

龍珠山在府城西北五十里下有石圓如珠更有奇石  
生成以易二字倒插凌霄文士多以易發科甲

白鶴山在府城西北七十里世傳東晉時仙姑丁秀英  
乘鶴飛昇舊有白鶴觀又西北為高胡山宋幸元龍  
壇記云陳夫乞萃徒輔高祖論功封高胡侯子程襲  
爵無後國除鄉里立廟祀之旱禱如響有永平二年  
斷碑可辨又白雲山山下有超果寺東西兩澗瀑布  
泉流柳州教授孫伯溫有記謂之小麻姑

社山在府城西四十里豫章記云南有樟木枝葉鬱茂  
上多奇鳥棲止土人異之立為社壇歲時祈禱又西  
為蓮花山峰巒攢簇如蓮花又西為坡山因東坡遊  
此得名

西龍山亦名鷄籠山在府城西四十五里高數百仞蜿  
蜒起伏如龍上有仙壇下有古洞天將雨則雲霧以  
興

鳳嶺山在府城西七十里方輿記云刺史應智珣嘗屯

兵其上嶺勢峻拔遠望如鳳相近為飛霞山相傳豫章吳真人猛修煉之地每齋醮有鶴數百棲息于此旬日乃去復有彩霞覆之

米山在府城北二十五里其平坦通行處名米嶺豫章記云四面流泉土地膏沃生禾香茂為米精美唐武德七年因產香米奏改州名為米州

華林山在府城西北八十里半屬奉新境華林實錄云西王母第九子元秀真人於此築壇以祭靈仙隋大

業末應智項遣義軍羅武於壇西立三將軍廟後遂  
號為羅武廟其山絕險元明盜據為巢詳見武事志  
荷山在府城南二十五里其前為琴嶺豫章記云池有  
紅蓮昔仙人王子喬駕白象來遊象化為石名白象  
石今山巔有丁王二仙壇下有棲霞觀黃金城亦名  
小浮邱明廖暹有荷山賦陳邦瞻作荷華山放歌  
鈞山在府城南三十里山巔有劉仙翁洞又南十里為  
羊山俗名石炭嶺宋山川記云山產燠石以水沃之

即燃措鼎可烹

敗伏山在府城南一百里方輿記云陳武帝與賊戰此  
破其伏兵故名

蒙山在上高縣南三十五里方輿記云峭壁橫險厥材  
千尋常有白雲清靄蒙蔽其上宋慶元六年有銀鉛  
坑冶後復置銀場提舉司以礦絕而廢山有瀑布泉  
分為二派

末山在上高縣西六十里東連九峰唐人云韞映迴合

金方口人志卷八  
迴出雲末故名有道詮禪師道場宋阮閱詩有九峰  
深處古禪關之句

靈峰山在上高縣南二十五里舊傳風雨晦冥之夜山  
有赤光其大如斗號曰金雞土人以為神即其頂立  
靈峰廟相近有寶雲山巉巖翠靄中有僧廬曰寶雲  
院

鏡山在上高縣東北二里許其山有三端圓如鏡中一  
徑通行者兩山對峙如門縣治之後照也其下為鏡



溪入縣治北十步許有觀山登之可望數里縣東水  
南五里許有屏山其勢連亘若屏

石潭山在上高縣西五里許山下潭中心有龍門石灣  
溪水口相近者為柘湖山山麓坦夸鄉人栽柘以飼  
蠶遇蜀水秋漲則瀰漫如湖又有小水山橫長七八  
里許起伏如浪

鐵索山在上高縣西二十里形有九十九股

桃源山在上高縣西歸然如屏春月萬花爛然宋幸元

龍號曰人世仙境大書小桃源三字以顏之西有西嶺三峰聳拔狀若筆架南有天嶺行者若登天然北有大王嶺石峰插天

萬石蒼山在上高縣曲禮里之水口高數十仞大可數百圍其石紫而光潤四源十坑之水皆潄於石蒼之下而東石蒼之外有圓峰十餘如貫珠焉

櫟頭山在上高縣西一百里抵袁州萬載界

白馬山在上高縣北十五里舊傳有白馬嚙草山頭人

至輒奔騰而沒鄉人異之因名

顧城山在上高縣西北十五里相傳昔有顧王都其上  
每歲仲冬鄉民相率祀焉按山南二里有古屯軍營  
則顧城乃故城之訛也

黃岡山在新昌縣西八十里山勢峻拔為縣內諸山之  
祖明萬厯間賊據為藪因具題封禁

三台山在新昌縣學桂峰第一樓之北縣治南有案山  
今名綠秀山其下有澄潭

桂林山在新昌縣東二十里舊傳陶淵明所居

尉山在新昌縣東北七十里舊傳漢梅福為南昌尉上書言事不報攜妻子隱此宋幸元龍記云新昌有小溪溪有橋曰迎仙西行六七百步曰尉田子真所嘗田也田去宅仙觀半里許唐代改祠為老子宮歷宋開禧乃復焉

靈源山在新昌縣東六十里蘇轍有句云三年欲到官為礙百里相望意自通蓋擬遊洞山靈源未得也狀

元姚勉居山下其地名天德鄉

石臺山在新昌縣南二十里下有清涼院東坡子由嘗遊此有詩又南十里為志留山舊傳梁時志公駐錫於此下有定慧院

螺山在新昌縣西十里俯瞰螺灘有東列螺西列螺俗呼贛山

鳳凰山在新昌縣北三十里層巒聳峻下有仙人石在新會市之溪濱相近者為雲溪山其下有度門院山

幽泉清宋聶昌龔端讀書於此

章平山在新昌縣西北三十里瀑泉穿石飛雪數仞

吉祥山在新昌縣北五十里一名瑞雲山唐悟本禪師  
居此上有聰明泉下有吉祥院

八疊山在新昌縣西北九十里方輿記云疊嶂縱橫斷  
而復聳故名山接奉新及寧州界

五峯山在新昌縣西北一百里上有歸雲積翠羅漢月  
桂佛巖五峰故名中有瀑泉高懸如布宋崔鷗嘗遊

此尚書倪思詩千巖萬壑爭獻狀秀色寒光奪人目  
黃檗山在新昌縣西一百里山之絕頂有寺曰驚峰唐  
宣宗龍潛時遊方至此嘗與黃檗禪師觀瀑布因共  
聯句一名驚峰山

台峰在府城西北三十里斜溪之西三峰如台星故名  
慈雲峰在府城西北六十里宋張商英曾遊此有詩  
碧雲峰在府城西南八十里上有雷祖殿其側有祈夢  
館又有員嶠峰在府城南八十里與清江縣接界

九峰在上高縣西四十五里末山之東北其峰有九曰  
雲末飛雲香爐翠霞蒼玉芙蓉清流蛾眉天竺皆奇  
聳峻拔東有靈龜洞後有羅漢洞宋蔣之奇漕江西  
嘗遊此明鄒文莊守益開叛講堂皆有詩

多寶峰在上高縣南三十五里蒙山之下宋慶元間銀  
鉛大發故名

烏峰在上高縣南七里上產烏藥故名入距縣二十五  
里有梅峰禱雨立廟



折桂峰在新昌縣東門外尖聳秀特俗呼火焰山宋縣令劉明老剗平其巔以息火災明成化間知縣羅贊培之亦不為災

石鼓嶺在府治西與府學對峙下有潭上有石鼓及卧牛石明正德間知府鄭璠伐石壘塔其上名筆峰今廢

主嶺在府城西北近華林山有南北嶺三寶嶺皆山勢危峻明正德七年官兵分屯於此以討華林山盜諺

云若要華林敗三寶去立寨

馬鞍嶺在府城東二十五里宋景定間民多避亂於此  
曦嶺在府城西南三十里府學門對之峭峰如畫又西  
南二十里為虎跡嶺相傳晏仙騎虎飛昇之地石有  
虎跡

蔭岡嶺在府城西南八十里有墟市設巡檢司

李家嶺在府城西北六十里下有石洞鄉民嘗避寇於  
中有插天石形如筍高七八丈

敖嶺在上高縣北三里即鏡山最高處也方輿記云晉  
敖真人得道之所上有磨劍石煉丹竈

蓬萊嶺在上高縣西六十里相近有刁嶺又有石嵩嶺  
奇石聳如嵩嶽故名

黃鳳嶺在上高縣西九十里俗傳昔有黃鳳集此

寶珠嶺在上高縣南三十里相連蒙山世傳道明禪師  
自庾嶺來卓錫夜以寶光珠照十方故名嶺與新喻  
縣連界

金匱山志卷之二  
浮樓嶺在上高縣西一百里末山之西山峰秀拔下有  
小溪俗以其形如樓之浮水故名其山半屬袁州萬  
載縣

銅釘嶺在上高縣西靈峰山側一名銅精嶺俗傳許旌  
陽以銅釘釘蛟於此

謝君嶺在上高縣西千春南鄉亦名大烏尖嶺高數百  
仞舊傳謝仲初於此得道謝本萬載人嘗尋真躡其  
嶺

袁州嶺在上高縣南九十里末山之南其嶺至分水界屬上高界外屬宜春縣

倉庫嶺在新昌縣東南五里五鹽嶺在縣治西南二里合鹽泊鹽洲鹽渡鹽溪鹽步為五故名

石門嶺在新昌縣北二里里人蔡疆鑿石開途以便往來如門雙峙縣有八景石門長嘯其一也

黃茆嶺在新昌縣北二十里脈自章平山來上有楓樹三株大大餘雲氣磅礴絕頂鑿石通道宋淳熙間有

龍見居民羣聚鼓噪龍投山下須臾地裂水涌近山田宅決沒為湖者數頃因號其地曰龍破

金剛嶺亦名萬松嶺在新昌縣北五十里上有洞山寺後為雲峰壇相傳智慧禪師種萬松於此每種一松輒誦金剛經一卷故名又縣北有彭祖嶺姚雲詩彭祖嶺頭春草生逍遙洞口暮煙橫

西嶺在新昌縣東北六十里形若拜舞俗名攀龍山又東北十里為北嶺峰巒萬疊中有瀑布又東北二十

里為三聖嶺

大姑嶺在新昌縣北八十里與八疊山相連縣之關隘  
宋元設巡司於此上有仙姑剪刀石

雲峰嶺在新昌縣西北九十里其山性腴四時之菜自  
生上有龍潭真武壇張梅二仙壇及仙人石跡又西  
北十里為分鄉嶺接南昌寧州界其下有溪

五龍岡在府城西下有潭深數仞上有廟先祀漢穎陰  
侯灌嬰後祀刺史應智瓊今為城隍廟

龍岡在府城東一里梁太清間為龍岡寺唐即其地建靖州今為禪寂院

退田岡在府城西北二十里相傳兄弟有訟田者至此而悔故名又西北二十里為青石岡暴雨後有石錢石磨等物如指頭大者甚多

舉子岡在上高縣西六十里唐進士易重居此相近為天則岡土高一丈八尺岡南有遺甃故碑俗云古王者墓



旺賢岡在上高縣北二里學宮後鎮一名黃田岡

組繚蒼岡在上高縣南二十五里法忍寺北相傳許旌  
陽煉丹於此山湫有蛟魅護為淵數輒作洪水衝漂  
丹室乃遣神兵擒之釘於石壁寺前有丹井大旱不  
竭上有行祠產無名子

赤珠岡在新昌縣東八里產紅珠又縣東南二十五里  
有柘木岡

蒙巖在上高縣蒙山下有二石洞相望數百步能出雲

為風雨歲旱禱焉上洞不可遊王沼當戶俯視惴慄  
下洞虛豁其廣函丈深不可究又有巨石屹立巖間  
上下無所附謂之無根石

荔枝巖亦名龍巖在上高縣九峰寺前有石盤其上生  
石宛似荔枝有洞曰龍洞

靈巖在新昌縣三十七都亦名天隱洞石像甚奇右折  
百餘步有石巖青質白理隱成佛字拭之愈顯

春洞在府城後碧落山每遇立春日陽氣吹灰出外以

雞鶩羽貯其中輒軒舞而出諺云袁州更鼓瑞州春  
指此

迷仙洞在府治後即碧落洞又名李八百洞閉塞不可  
入蘇轍有洞門藤蔓鎖煙霞之句紹興壬申州守羅  
薦建屋洞旁

四基洞在上高縣南一百里舊志云洞基占上高宜春  
分宜萬載四縣界故名明一統志作四溪洞

慈光洞在上高縣西四十里緣梯而下有門可入內可

辟兵壁間題云唐乾符二年黃巢作亂在此逃避相  
近有鄧敖二仙洞

真遊洞在上高縣西五十里潤溪泉之側洞極深廣有  
佛像石乳及石碁局又西十里為石含洞洞有井鄉  
民歲首以火燭井水溢歲豐涸則歉旱

龍王洞在上高縣西茆岡有泉流出早晚黃濁與潮候  
相應有石可坐百衆距縣百里許

小石龍洞在上高縣上馬湖之右其山形勢如屏洞窈

黑非炬莫行傍有兩臺酷似龍頭角鱗甲具備禱雨  
多應

龍泉洞在新昌縣西十五里俗傳源出離相院穿地十  
里乃出流於溪宋大觀中崔鷗遊此有記

九宜洞在新昌縣西北鹽溪中有靈石自成峰巒水洄  
可觀雲氣上浮則風雨至

桃花洞一名雷孚洞在新昌縣北二十里澗壑幽邃明  
里人熊肿子經臣結茅居此號楓山逸叟

呀口石在府城西北近華林山明正德間劇賊陳樞一  
自詭其神殺人祀之用以駭衆

火石在府城北調露鄉其石黑色如鐵舊傳丁仙姑煉  
成者丁氏覆以亭世紀之高安志云宋丁綢知韶州  
任滿載還其說為允

金石在上高縣儒學前上有三了司馬地鈐云金石口  
開丞相出羅漢石在縣東羅漢院側相傳江漲石隨  
水長

葫蘆石在上高縣南十里狀如葫蘆又縣東二十餘里有白面石以形似人立故名

厭水石在新昌縣東五里其石高五尺徑一丈相傳許旌陽立此以厭邑之水災

夜合石在新昌縣東北五十里洞山寺水口相傳其石晝開夜合今不復然

顧淵石在新昌縣西南三十里半入淩江嶰岫高聳明成化間豪民漆姓伐石燒灰學使鍾城給榜禁止

錦江舊名蜀水自袁之萬載發源至上高合新昌水入江經府城東匯南昌之象牙潭入章江諺云錦水入市河朱紫滿城多蓋錦江貫南北兩城之中分一支入南城也

鐘口江在府城南三十七里源發荷山入錦江梁時人於此獲古鐘九乳形制奇古因以名江

凌江在上高縣南發源袁州萬載八疊山於龍河渡東流分脈經縣城與滕江合流經府城入章江



崇浦江在新昌縣東四十里太平鄉諸水合於此經上  
高出安塘河入錦江

滕江在新昌縣北三十里天寶鄉諸水合於此達鹽溪  
出凌江口入錦江

清湖在府城東十五里其水四時清瑩明巡撫韓雍訪  
隱士朱孔彰於此楊潤撰記

蔣家湖在府城南稅課司之下又城東南有陳家湖市  
河經其中又曰練湖在萬安縣治後

金匱山志卷八  
平湖在府城南十五里有鷺橋鷺峰諸景又南五里為  
珠湖世傳丁王二仙遺珠於此

藥湖在府城西南二十五里相傳呂仙曾遺丹故湖蛙  
不鳴李攀龍詩丹藥異人遺湖天蛙聲廢銅湖在府  
城高安縣信義鄉注田數千頃接豐城縣界

白家湖在上高縣五里許灌田甚廣

白澤湖在新昌縣東二里相傳許旌陽洗衣於此至今  
水不污濁一名濯湖縣北十里有松湖舊有熊氏花

圃

龍口水在府城西南六十里源發蛟湖北流至花園渡  
入錦江一名談口水

華陽水在府城西南一百里有小溪自新喻縣界流至  
華陽北入錦江

隱泉水在府城南釣山之東北泉沸湧出于平田自三  
十六陂流出曲水橋入清江界合贛水

曲水在府城南六十里發源蒙山流出潦許口東入贛

水其勢迴環縈曲故名

鳴水在府城西北六十里北流合奉新江華陽實錄云  
碧澗飛流空谷振響絕頂有石高數丈以物扣之其  
聲如鼓

斜口水在上高縣西十里發源蒙山合末山九峰水厯  
深村斜陂入江

六口水在上高縣北十里源出上夫西流南經河西陽  
樂花陂至六口入江

石洪港水在上高縣東十里源出上夫東流南經辛城  
合沙溪武泉至甘羅渡入江

易樂水在上高縣西南一百二十里源出乾陀嶺經永  
平至紫府口入江

章舍水在上高縣東北三十里源出新昌縣黨田塘浦  
經黃塘至廣樂城頭入江

白竹港水在新昌縣西四十里源發高嶺南流經上高  
縣入江

小斜川在新昌縣西南二里翰苑臺之下縈迴曲折入於鹽溪宋僧覺範以其風景類潯陽斜川因名之元至正間典史羅思敬構亭於上劉湏溪作記

市溪在府城錦江水自靖安門流入城經三讓橋世濟橋迤邐而東出朝陽門復入于江宋寶祐癸丑惠政橋成有錦水市河連之象是年姚勉及第歲久湮塞明正德八年知府鄺璠濬之可通小舟嘉靖乙未太保吳山及第

碧溪在府城自幸龍王廟前流經通真橋至府學前入江

務農溪在府城東三十里其水自新建縣界至高安縣境南流入江

鹽溪在新昌縣西太和門外一名若耶溪上有鹽洲

西溪自寧州發源至新昌縣一百五十里回繞而東入上高縣東溪在新昌縣東北源出奉新界流入上高方塘溪在新昌縣西四十里發源黃檗山流入上高

秀溪在新昌縣十五都今名查溪相傳晉陶潛第五子  
佟居此有淵明讀書堂靖節橋遺蹟

末山潭在府城米山西潭極深險舊傳有巨牛赤尾陰  
晦輒出傷禾稼人畜應刺史智顓除之塞其潭蘇轍  
詩人言西有蛟蜃穴閨年每與風雨俱

幸龍王潭在府治西五里幸氏譜云唐祭酒南容五世  
孫潭字子淵有異術經汴都嘗致書于鄉人曰城北  
門數里有潭傍有古木即吾家也叩之必應持書者



如所戒果有二童子出俄一丈夫繼之宛如汴都所  
見邑人異之為立廟歲旱禱雨輒應歷代勅封龍王  
舊志作幸南容者悞

樟樹潭在上高縣治西儒學前一名學潭大江淵靜為  
巨鱗窟宅鳳潭在縣西五十里雲末峰之巖下

龍潭新昌縣有三一在二十九都雲峰壇一在三十都  
元道觀一在四十都黃檗山

鮎魚洲在府城東二十五里當錦江水口之衝中流突

起竹木縈迴春夏水溢洲隨水長秋冬四周白沙如雪上有樓閣可供遊眺

鷓鴣洲在上高縣羅漢石東司馬地鈴云鷓鴣洲合狀元生又月沙洲亦名狀元洲在縣東二里許國朝康熙十年知縣梁淑乾倡議建塔於上

仙姑洲在上高縣西六十里俗傳有女仙經此

祿陂洲在新昌縣東南舊儒學之左

進龍池在府城東縣學之右南流入錦江舊為學池棄

以畀民明正德十年知府鄺璠復取隸本學又府城  
鍾秀門外有紅菱池亦隸學宮

飲馬池在府城北五十里浮雲山南甘泉清冽相傳應  
智項義兵屯山下飲馬於此

劍池在府治後圃相傳仙人李八百淬劍于此中產白  
蓮宋黃庭堅賦製劍池之菡萏以為裳者是也又新  
昌縣北七十里亦有劍池傳是許旌陽磨劍所

星落池在新昌縣南三十里舊傳有星墜地成池雖早

不涸雖潦不盈

川泉在府城南八十里南城村又府城西北馬鞍嶺有

吳城瀑布泉

武泉在上高縣北十里泉深莫測溢為沼中多蘋鯉俗云不可食取食輒死上有晉皇甫武將軍廟故泉以

武名

普潤泉在上高縣西十五里亦名貫珠泉其泉自石竇迸出莫窮其源循石厓為平地昔方廣十丈今止丈

餘宋時有普潤院久廢

巖洞泉在上高縣南三十五里溉田甚廣抵新喻縣界  
七星泉在新昌縣城內宋令劉明老鑿七井以應七星  
又縣西十里淨慧院內有五色泉

竹山泉在新昌縣西十五里柴源之竹山渦口氣充味  
厚絕無塵滓清晨汲飲可已腹痛

虎跑泉在新昌縣西黃檗寺方丈內舊傳有虎跑地出  
泉汲引不竭

丹井有五一在府治後圃仙人李八百煉丹之所一在府城東南四十里許旌陽煉丹之所一在城西七十里晉丁義君女秀英煉丹之所一在城南七十里許丁王三仙煉丹之所一在上高縣南二十五里許旌陽投丹之所

狀元泉井即舊貢院井今在縣學戟門左井上有亭歐陽世善扁曰天一重清今廢

花塢井在府城北三十里明正德七年華林賊執通判

姜榮妾竇氏至此投井死焉今作亭其上

白龍井在府城東十五里祥符觀昔有白龍出此故名  
東陽井在新昌縣浴德池之左久塞

國朝康熙四年知縣黃運啓開濬

乳泉井在新昌縣西十里寶蓋寺之側其水瑩白如乳

### 袁州府

袁山在府城東北五里峰巒秀拔晉高士袁京隱居此  
山卒葬其側故名以袁名州義因山也大袁小袁兩

山相對唐人詩袁山大小雙螺並秀水東西一帶橫  
仰山在府城南八十里乃袁之鎮山也周迴數百里高  
聳萬仞可仰不可登因名絕頂有集雲峰入夏雲冒  
其巔則雨立至冬微陰即停雪山下有唐鄭谷讀書  
處太平興國禪寺及二神廟小釋迦骨塔

湖岡山在府城南十五里晉鄧表故宅山頂有煉丹臺  
養丹池朝斗石

小仰山在府城南三十里晉鄧表修煉於此又號鄧表



峰上有泉壇石曰藥竈又名水晶山宋州守蕭炳詩  
萬丈青山插碧天真人煉藥石依然

蟠龍山在府城南四十里自麓至頂凡三十六曲有蟠  
龍寺唐末鎮南節度使鍾傳建四面壁立湍瀑飛瀉  
龍門關扼其前

石門山在府城南六十里石峭如壁中通小徑又南十  
里為木平山山有三峰宋州守王古禱雨有應遂名  
其中峰曰妙慶左曰瑞光右曰慈雲

震山在府城東十里下有巖幽深險僻唐彭雲隱釣於此寶應中徵召不就郡守嘉其行因名其鄉曰詔君鄉巖曰詔君釣臺唐盧肇有震山巖記又東十里為鵬山

坤長山在府城西南七里山自坤方來連亘甚遠故名書堂山在府城西南三十里唐盧肇讀書於此萬載縣西八十里亦有書堂山晉習鑿齒避地處

石屋山在府城西北三十餘里洞深百餘丈有石柱石

鐘石鼓之屬

老山在府城西南六十里崇高峻拔山巔飛瀑下注清  
瀝江北入秀江

寶山在府城北六十里世傳肅禪師過此山遇訟者勸  
之云欲出輪迴道先回自己心訟者以此言為寶故  
名

望鳳山在府城西北七十里中有一峰遠觀如鳳

喝斷山在府城北一百二十里與萬載萍鄉及湖廣瀏

陽縣接境兩山峙若天門中通一徑為八省之咽喉  
鈴岡山在分宜縣水南二里新澤水出于右長壽水出  
于左夾于山末故曰鈴山勢聳特登之可眺一邑上  
有仰山行祠山腰有泉病者飲之輒愈山椒有問東  
亭明推官徐之益創今傾圮

國朝守道施閏章重建撫松亭

仙臺山在分宜縣東南五里羣山環抱一峰高聳相傳  
昔有牧羊者登山遇兩仙對弈語曰子下界人也何

為來此今名其村曰下界

鐘山在分宜縣東十里水南曰南鐘山水北曰北鐘山  
裴子野宋略云永嘉元年因洪水有大鐘從山下流  
出驗其銘乃秦時所造因名山有巨石臨江如峽故  
又名鐘山峽輿地紀勝云有漁人得一金鎖長數百  
尺又得一鐘如鐸狀舉之聲如霹靂山川震動漁者  
恐亦沉於水或曰此秦時驅山鐸也

昌山在分宜縣西二十里險嘗覆舟舊名傷山後改今

名又名昌山峽顧野王輿地記云晉永嘉四年羅子魯於山峽堰為陂灌田四百頃

銀山有二一在分宜縣南二十里山巔多白石一在萬載縣西十五里山有巨石白如銀石間有洞可以避寇

清風山在分宜縣南三十里有寶慈觀西晉時黃仙姑嘗修煉於此有煉丹池又南二十里為白巖山有永清院

玉岡山在分宜縣西二十餘里卓立如削玉其下平夸  
幽曠又西為雪山鍾表山七峰之秀鎖昌山三折之  
灣古木繁陰冬有積雪又西為光子山以晉李琳得  
名又西為大梅山其山多梅成林

臺山在分宜縣北二十五里山頂平敞若臺

雞足山在分宜縣北八十里旌儒鄉山下勝因寺寺背  
有石孔日出鹽以足寺用後有利之者鑿而大之鹽  
遂止

徐仙山在萍鄉縣西三里世傳有徐姓者於此修真後  
仙去事詳夸堅志

筆架山在萍鄉縣南里許高聳秀拔與縣後山相對舊  
名迎鳳嶺以縣治勢如飛鳳而此山與之相迎也宋  
乾道中縣令趙公廩建壇其上高七丈許明嘉靖中  
知縣梁用達以孤峰獨聳增建其二於東三塔相連  
形如筆架嶺有四望亭仰山二聖壇遺址萬厯中知  
縣陸世勛重修



毛仙山在萍鄉縣東二十三里古有毛仙驛方輿記云  
昔有人過此山逢一人遍體生毛言辭異常後不復  
見朱子過此嘗問驛卒云狐魅所為遂題詩驛中

石姥山在萍鄉縣西五十里有石屹立如姥瞻望宋州  
守周兌詩頑然本是無情物應誤行人指望夫

南源山在萍鄉縣北五十里下有廣利禪院宋宣和中  
縣令鄭強建以息兵厲山南有泉四時不竭相近者  
為浴室山山下有浴池

九嶷山在萍鄉縣東七十里連帶九峰因名山側有仙鶴嶺若雙鶴飛舞狀

五金山在萍鄉縣西七十里五峰相連面皆向兌因名楊岐山在萍鄉縣北七十里世傳楊朱泣岐之所傍有玉女殿內有九石房相映如屏風世傳仙真所居又有普通院及隋煬帝壇相近者為瑤金山唐勅封普濟大師道場也上有涑水洞靈丹井

楚山在萍鄉縣北九十里相傳楚昭王曾經此

武功山在萍鄉縣東一百二十里跨吉袁二府境舊志云紹興間洞寇猖獗趙宸統禁軍勦捕有功立柵山上因名據安福志由陳武帝時更名袁志疑失實

羅霄山與武功山相連下有石潭深不可測太平寰宇記云潭水傍出石乳又名石井歲旱禱之以大木長三四丈者投水中即雨水湧木出雨即止或曰昔有羅霄居此因名其下有羅霄洞據安福志盧蕭山本因瀘瀟二水得名袁志別作羅霄或說乃譌傳也

龍山在萬載縣治後龍江經其下山勢剝崦為縣之鎮距治東南二百步有三石卓立潭中亦名筆架山縣南三百步有月臺山狀如滿月又縣東南二里許有白塔山

紫蓋山在萬載縣西北十五里山勢崇聳屹若車蓋舊名雲蓋山或云仙人謝仲初嘗遊此有紫雲上覆故名

五雷山在萬載縣北二十里五山相連與逍遙觀拱對

遇旱禱雨

湯周山在萬載縣西三十里相傳晉安帝時湯周二仙  
修道之所上有觀觀後有碁盤石試劍石

峰頂山在萬載縣西南三十里相傳為馬祖道一駐錫  
處舊有上中下三塔今惟中塔存焉有泉清冽歲早  
應禱

金雞山在萬載縣北三十五里山童不毛有巨石在山  
下入夜現金雞故名

清泉山在萬載縣東北四十里絕頂有瀑布泉

謝山在萬載縣北七十里輿地廣記九域志皆以宋康樂公謝靈運得名舊有靈應觀劉長者讀書堂今廢九龍山在萬載縣西一百里其山有九嵯嵯秀麗常有雲覆之又西二十里為鐵山地界湖廣瀏陽縣舊產鐵

羊角峰在府城東十里雙聳如羊角一名雙箭峰聳翠峰在府城西三十里峭壁孤峙唐盧肇有詩

甘竹峰在分宜縣西三十里

明山峰在萍鄉縣東北二十五里其峰特立可以四眺

中有仁濟院

玉女峰在萍鄉縣東六十里亦名玉女墩輿地志云天  
將雨有五色雲氣湧出石間俗呼玉女披衣宋洪炎  
詩千年舊跡今蕪沒惟有長松挂蔦蘿

鵞鼻峰在萬載縣東五里地名東岐元虞集愛此山若  
蜀中鵞鼻峰因名

神岡嶺在府治南八十步凡祀仰山皆由此故名又府城西四里有王坡嶺舊傳有王者葬此

銅釘嶺在府城西南五里相傳長沙溫氏墓宋初削平僭偽因鎔銅灌其頂於史無徵又西南十里為金鐘嶺

仙女嶺在府城西三十五里地名清瀝蓋宋成恭復皇  
后父家也

嚴嶺在府城北五十里山勢峭拔自下而上有小徑十



八折其頂名仰公山下有小溪溉田甚廣

澗富嶺在府城南六十里與安福縣接境宋嘉定四年嘗於此置寨以遏郴寇

大軍嶺在府城西北九十里山腰有泉名水漿湖相傳隋煬帝時戰場

袁嶺在分宜縣西北十餘里其上峰如列戟舊傳東漢袁閎隱居其下

石分嶺在分宜縣南五十里抵安福界又南十里為仰

嶺極高峻登之可遠瞰吉安城相傳唐時有尚雅祖師騎虎至此因建寺

豸跡嶺在萍鄉縣南三十里山勢聳矗石形類豸上有土濠相傳元季禦紅巾賊扼險于此

聖岡嶺在萍鄉縣東五十里衆山迤邐望之蒼翠晉甘卓築壘其上有聖岡廟建以祀卓又縣南馬跡嶺亦卓遺蹟

案山嶺在萍鄉縣北五十里左右兩山相峙中平如案

因名有亭曰高寒為往來休息所

鶴嶺即洪岡嶺在萬載縣西南二十里與仙遊巖相望  
十八渡嶺在萬載縣北四十里舊路在嶺下循環一水  
往來凡十八渡後闢路嶺上行者便之俗謠為十八

洞

白水嶺在萬載縣西八十里高數十仞嶺下平坦居民  
衆多中有小溪水色白故名

黃皮嶺在萬載縣北八十里與謝山相對上有石屋相

傳黃皮二仙修煉於此鄉人祀之

太陽嶺在萬載縣西一百里形勢陡峻周廣百里未旦日光先射傍晚不暝故名

萬勝岡在府城東五里楊吳時柴再用與米志誠討劉景崇每出師岡下不戰一日列陣岡南大敗之見九

國志

天子岡在府城西北五十里傍有駙馬塘

楊桐岡在萬載縣東北二里許其岡多產白楊桐樹縣

西里許有赤硃岡產土硃其東建社稷壇

小南嶽在萍鄉縣西七十里山勢嶙峋上插雲表秋月  
登眺霞彩萬狀瀟湘廬阜悉在目中為縣境八景之

一

化成巖在府城西北五里下瞰秀江舊名化成臺僧屋  
其上名開化院巖內有石佛唐李衛公德裕嘗讀書  
於此後祠之詳見古蹟

粟坑巖在府城西南七里深闊三十丈有小竇通明可

步出巖頂

帝鐘巖在萍鄉縣北五十里高十丈深四丈中有倒石長三丈其形如鐘

翠巖在萬載縣城北百餘步石壁凌空面挹龍江巖下有穴泉噴清冽

水晶巖在萬載縣西五十里巖中飛瀑瀉出如玉歲旱禱焉又縣西十里仙遊巖有石類鐘扣之清越又有石類道士狀俗稱仙人石

靈棲巖在萬載縣西九十里高數丈有崇勝寺巖下有  
泉自周公洞流來灌田數百畝相近又有龍成巖其  
地名梅陂山勢聳特中有石室宋元祐中有獵者逐  
獸至此後人往觀得一獸骨其頂穹然如角識者謂  
龍蛻骨也室中有石如列仙者數十下有石鐘扣之  
有聲有石硯巖溜注之墨橫硯上筆在硯傍皆石也  
有石人坐白沙傍如鬻鹽狀或埽之他日復積

玉谿洞在府城東半里許宋李觀夢符居之因自號玉

谿叟今塞府城東北五里有石窟洞石上有龍爪跡  
青蓮洞在化成巖側小穴丈許虛明可愛舊扁曰雲谷  
國朝康熙二年守道施閏章謂其狀如青蓮半開易以  
今名有石作蓮花半未開玲瓏幾曲盡蓂苔之句

石乳洞在府城東三十里深一里許滴乳堅凝成觀音  
羅漢像人或遊宴其中散核狼籍經宿如埽宋教授  
鄭王賓鐫石記其事太平寰宇記云宜春有石室山  
數石相連高十餘丈素壁如雪即此洞也



漠塘洞在府城北六十里初入閣可數丈有潭水流洞外繼入小洞漸遠一竇通明地名帶塘距漠塘已二十餘里鄉人嘗避寇於此

洪陽洞在分宜縣西十五里袁嶺三峰之麓世傳葛洪及婁陽所居洞口有巖巉坼如蓋由洞門入石室東向去地高數十丈初入一間曠爽可容百人由西竇而入始幽闇舊有人至七十二間聞昌山渡鶯聲今遊者可至第十二間餘則隘不可行矣其中有白沙

如鹽傍有鹽翁石傘石帆石鼓石田及仙佛諸像洞  
中有水春溢冬涸雲霞綢繆一穴可通絕頂仰見天  
日俗呼天心又有石燕至春或能飛翔明邑人洪經  
奎有記

國朝康熙辛酉知縣蔡文鸞重刊洪陽洞圖有序

小洪洞在洪陽洞之頂門甚隘其中廣容千人有石倉  
石閣之類舊傳晉宋人有題名在深窈處無火不可  
入也

靈仙洞在分宜縣北三十里洞內去地三十丈景物不減洪陽但差小耳有丹爐闊二尺厚三寸許圓如月略玷缺傍有一石磨與丹爐尺寸不差毫秒或以為爐蓋也

桃源洞在分宜縣北一百三十里洞口空闊東北行半里許至一石室有石鐘石磬扣之有聲直北一室天窗虛明石級如田田傍生荔支有池泓澄石龍夭矯其上距洞二里許為風洞居山之陽不可入傍有泉

流水潺湲清風生焉冬溫夏冷避暑者置盤餐於中  
食頃輒凍其上有亭

真如洞在萍鄉縣南三十里洞有石鐘石龜又有石如  
人形相近者為裏大洞圓如覆鐘兩洞相接上洞有  
石名雪峰一石竅斜穿投以石良久乃抵泐流下洞  
口出山腹巨石如屏中有小谿兩洞可容千人宋建  
炎初避亂者多歸焉巨寇張成攻圍數日不克乃退  
又有下石陂洞在縣北四十里亦可避兵

竹山洞在萬載縣南二十里洞闊非丈尺計有水經其中為學前江源前後兩門深五里許內虛敞有石田石屋一石高三丈類塑像遊者自後洞出前洞歲旱於此禱雨

雲峰洞在萬載縣西九十里黃茅岡門闊丈餘中虛明循級而下則漸黑有石若鐘磬若仙佛不可枚舉澗內產魚及石燕里人禱雨者嘗窮其源辰而入出已日西

石穴在府城西北六十里燕州神廟穴內可行三十里  
見水繞竹叢莫知其源

牛欄峽在府城東二十里左有金雞山右有銀鑄山相  
對若欄表志云五臺三峽此其一也

盧石在府城東湖上相傳盧肇家石三峰九竅奇秀可  
愛宋州守祖無擇徙置湖上其詩云選置東湖最佳  
處四面澄波映天碧倚空突兀無與鄰頓覺亭臺增  
氣色

響石在府城南三里獅子嶺北聲傳響谷故名距府城南六十里有靈應石在仰山正祠內其形如靈龜之

文

望夫石在分宜縣西十五里昌山峽水中地名望夫堰  
鈐岡志云唐會昌前有太守鄭公字望夫於昌山下  
百步餘修復舊堰引水自沙湖過李家村經縣治北  
合騎嶺水以灌田後人思其德以字名堰

鎖石在分宜縣南寶雲寺山傍有石壁立其紋橫起如

局鎖狀世傳石舊有竅有沈道人者結菴於此忽不見視石則竅已闔矣

金星石在萍鄉縣東五十里其石如室中有二星光采如金又縣東大安里有羅漢影石在白鷺坑宋元符間巨石中裂其聲如雷一屹立一墜田間各有形如羅漢

巨囉石在萬載縣東一里荷花池東山巖側有石高數尺上有孔吹之若巨囉聲迴風入竅亦然縣北五里



有獅子石狀類獅下有潭亦名獅子潭上鐫獅巖二  
大字傍刻大德二年春月書

謝仙石在萬載縣西四十里一名麻鞋石上有鞋跡

秀江在府城北門外源發羅霄山流經府城西十五里  
為稠江至府城北澄清深碧因名下經分宜縣治過  
新喻及臨江府流合章江

清瀝江在府城西南六十里源出老山山頂有瀑數派  
一派瀉山下為此江過輦溪又過了山分二派一為

官陂水一為古江又分二派一為司谿江一為新江  
會為麟橋江入於秀江麟橋江今在府西六里司谿  
江一名沙陂江古江舊傍山流今湮為田

嚴塘江在分宜縣東南三十里發源檀溪及李家礮出  
水口會新喻江

峴江在分宜縣南五十里出自雙源裏源會於雷同嶺  
下入章谿至石巖下為峴江築陂灌田數千畝

赤江在分宜縣北文標鄉源出珠塘之泉下流三十里

由江斜出昌山峽而合秀江

楊江在分宜縣西北四十里順流會秀江水

新江在萍鄉縣東三十里唐咸通中刺史顏遐福奏開以通湖南纔鑿十餘里而輟今俗稱其地為新江相傳開江時誤殺白龜功遂不就

龍江在萬載縣北五里源出縣西一百二十里金鐘湖下流入瑞州府境

錦江在萬載縣北三十里源出謝山邑人敖玉谿建橋

東湖在府城東三十步宋至和二年州守祖無擇於湖上建亭榭為觴詠之所淳熙間張杓知州事兄棡過此書扁後廢為圓菴嘉定間州守滕强恕濬湖修築今廢又城西十里有石湖

落星湖在分宜縣西五里廣五十餘畝其深莫測傍有龍祠歲旱應禱世傳唐耕者向氏母居此一夕見巨星流於屋遂成湖縣北二里有石岡湖廣六十丈灌田數百畝

金鐘湖在萬載縣西一百二十五里水分二派一東流至官莊過竹渡入龍江一流入湖廣瀏陽界

九曲水在府城南五里縈流凡三十里出赤橋入秀江  
仰山水在府城南六十里源發仰山東流出浦村入秀江

夢水在府城東八十里太平寰宇記云昔鍾儀於此村欲立縣夜乞夢果符所祝名曰思縣因以名水

介谿水在分宜縣北十五里發源界塘渟洄清澈中有

巨石平坦可坐其水冬夏不竭溉田千餘畝東南流  
十餘里至耽江會秀江水

竹橋水在分宜縣東北二十里自臺山發源至聖陂普  
光橋出小江口

汭江水在分宜縣南五十里源二左自仰嶺右自黃真  
人臺下旋繞至大清里泉江山下二水相夾出安福  
同橋廬陵板陂至吉水同江聚入贛江

萍川水在萍鄉縣南三十餘步源發楊岐山東流轉西

四十里到縣又九十里入湖廣醴陵縣界出淶口過  
潭州入洞庭湖宋蔣之奇詩倒流楊岐水即此

泉江水在萍鄉縣東二十里江心有泉湧出故名水中  
生絲花菜可食

羅霄水在萍鄉縣東南四十五里源出羅霄洞下分兩  
派東流者合縣東蘆谿水至宜春西流者出本縣境  
合湘東江入醴陵縣界

康樂水在萬載縣東北三十里太平寰宇記云謝康樂

嘗遊此因名源出謝山東流至邱江合龍江出上高  
野潯河水在萬載縣西三十里源出金鐘湖北流過魚  
鱗灘會竹渡水合龍河奔騰峻急舟行甚險里人立  
水府祠以鎮之

劍池水在萬載縣西一百里池廣大餘別有曾家源水  
經過於池合流下井田同靈棲巖水出沙江入金鐘  
湖舊傳許旌陽捕蛟洪州時蛟潛逃池中旌陽捕斬  
之因名



石洞水在萬載縣西南二十里源出竹山洞北流過楊  
河山合白沙水下南浦橋至縣學前過雙虹橋而入  
龍江

避賢溪在府城南三十里仰山正祠前自仰山徙廟于  
此見宋張商英碑記

鸞溪在府城西北六十里下流入秀江俗傳吳綵鸞與  
文簫游此

塢溪在萬載縣治東源出鸞鼻峰西流會學前江

雷潭在府城東北五里秀水至此成潭舊傳龍潛於內  
上有峭壁石罅龍鱗印苔成痕潭邊有釣魚臺竹木

陰翳

石牛潭在府城西五十里江流中有石牛又西二十里  
為飛劍潭相傳唐有王將軍者坐石上墜劍入潭今  
石上劍痕猶存

獺逕潭在府城南仰山之上泓渟澄深神龍所宅仰山  
又有雪谷潭水極冷雖盛夏不可濯

黃土潭在分宜縣西南二里昌山峽水下流匯而成潭其側有西關洲又縣南三里有楊柳潭縣東鐘山峽有轉鐘潭世傳黃巢黨以鐘烹牛其鐘靈轉入水

韓許潭在萍鄉縣北十里深可二丈傍有韓將軍廟縣北七十里有敷潭盤旋若渦有龍居之傍建惠澤龍

### 王廟

簫山潭在萍鄉縣西八十里匯五溪之水岸有巨石世傳簫史休息於此縣東百二十里有青龍潭旱禱輒

應

龍潭在萬載縣東北龍江中相傳有穴與獅子巖通舊  
有龍江亭今廢

鍋泉潭在萬載縣西南九十里有三巨石枕江許石中  
有泉天將雨雲氣自中起如炊煙俗名石鍋

盧洲在府城東演武場後以盧肇得名今縣學乃肇故  
居此洲向多喬木為居民所據蹟漸湮明萬曆六年  
知府鄭惇典清復之仍種樹其上萬曆末年知府黃

鳴喬建高閣以祀肇督學黃汝亨扁曰文標

沙米洲在分宜縣治東鐘山硤中春夏湍急白沙擁起兩岸如米邑人以占豐歉若南岸饒則南岸豐北岸亦然

金鰲洲在萍鄉縣西萍實橋下其長百餘步狀如汴水魚楊岐之水至此匯為潭流入萍川此洲為中流砥柱舊名金魚以其形長而大改名金鰲又在儒學禹門之西明知縣陸世勣因建占鰲閣其上

龍洲在萬載縣東北二里許即龍河渡約廣數百畝石洞金鐘湖二水西來環抱合流而東注

鳴玉池在府治西隅唐刺史張某剏今改為疏泉以疏西陂水至此也府治內有澄源池宋乾德二年州守呂延貞鑿取為政當澄其源意府治西北有防虞池因防火而名元季填塞今作軍營府治東南有礮沙池池內有石如礮

西池在府城西唐乾元中刺史鄭審所開池上有故城

潭木瓜島薔薇洲楊柳堤青田壇石橋灣釣磯今廢  
洗硯池在宜春縣學內相傳池中產綠毛龜

鳳凰池在萍鄉縣治南百餘步宋宣和間知縣鄭強因  
民多瞽乃相縣後地形如飛鳳展翼因鑿二池以象  
二目而民遂無盲疾元至大二年有瑞蓮生池中夏  
鎮撰記年久淤塞地為居民所侵明萬厯初強裔孫  
鄭惇典知府事清復之立鳳凰池碑七年知縣常自  
新令民種蓮於池清翠交映四周架以木欄

國朝順治間知縣刁之裔余士聰相繼疏濬

梳洗池在萍鄉縣東蘆溪鎮南玉女臺右

綠陰池在萬載縣南百步池廣四畝樹木陰翳

宜春泉在府城西四里唐地志云宜春泉醞酒入貢蓋  
指此一名靈泉舊傳泉日兩涌與海潮通後人滌溉  
其中遂止有比目魚今不常見

珠泉舊名湧坑泉在府城南門外方廣丈餘平地湧出  
溉田甚廣明萬厯丙申推官徐之孟築臺其下建樓



東西連簷接棟與宜春臺相望萬厯己未知府黃鳴  
喬重修後燬

國朝順治庚子知府胡希聖重建視昔加美

李惠聖泉在宜春臺仰山行祠下冬夏不竭病者飲之  
良愈宋政和間張沆為銘今填塞

溫泉在府城西南三十里修仁鄉定光院前氣溫如湯  
冬可浴以雞卵投之即熟水中有魚泉凡三出一在  
東岸上僧人甃為池一湧出江心巨石中石類釜上

寬五六尺許平坦可坐遊者多於此宴飲一在西岸  
下宋黃叔萬詩離火自天爍溫泉由此生

甘泉在府城北十五里山竇中流出味甚甘冽唐咸通  
二年僧道光築室為甘泉院宋嘉祐中州人李觀因  
僧智汪建二堂為之記又北十五里有潭泉灌田萬  
餘畝

卓篙泉在分宜縣鈴岡相傳仰山二神維舟卓篙於半  
峰遂有泉涌出舊建亭明萬厯六年知府鄭惇典重

修

源澗泉在分宜縣大清里溉田百餘畝

聰明泉在萍鄉縣西一百步其泉甘香宋葉景武讀書於此後登第故名縣西門外三里許有橫龍泉其泉出地中透佛座前至塔下清冽可愛金魚游泳人多題句

暖泉在萍鄉縣蘇家村冬溫如湯又有冷泉在宣教里夏冷如冰飲之能已熱疾又清江里有寒泉盛夏極

清冷

楓泉在萍鄉縣東二里許夏不涸冬不凝昔嘗汲注銅壺以定更漏傍有楓樹故名

雨湧泉在萍鄉縣北楊岐山相傳通海天欲雨水先湧  
溥泉在萬載縣東一百五十步儒學前其泉臨江味極  
甘美縣西二百五十步有卓劍泉在廣報觀右世傳  
謝仙以劍刺地泉湧出舊有亭今廢

涂泉在萬載縣東十里名泉陂約廣十畝澄澈泓渟有

龍居之每旱官民禱焉

義井在府治東集慶坊唐刺史李將順開鑿後湮塞宋  
淳熙間州守張杓修復之明弘治庚申知府朱華加  
濬

雙清井舊為龜鼻井闊丈餘內有兩小石孔在府治東  
北甘棠坊府儒學之左揚清井舊為左龜眉井橫二  
尺長六尺在府治北達里坊澄清井舊為右龜眉井  
橫直同在縣治前文會坊東明井舊為左龜目井闊

文餘在府治東北隅達里坊西明井舊為右龜目井  
在古開元寺浴院後今縣治前文會坊之西以上五  
井舊志云府地形如龜唐袁天罡於城內鑿龜鼻眉  
目井以全龜象不專為民汲亦取克制回祿之意歲  
久淤塞

國朝康熙戊申知府李芳春查覈原井挑濬今俱疏通  
如舊闔城便之

秋家巷井在府治北百餘步清水池西委巷中井水特

重漏壺用之又司理院井其水亦重

羅霄井在萍鄉縣羅霄山下即葛仙浴丹池也

聖井在萬載縣東北安仁坊世傳宋乾道間普菴禪師  
嘗游息於此時值多疫師取井水飲之疫遂痊

真君井在萬載縣西廂外二百步世傳謝仙曾經此就  
姬求水姬辭水遠難致謝指其地曰鑿此可得水後  
果驗

江西通志卷八